

Mama di Natalee lo keda awor na Aruba te cu 4 di September

ORANJESTAD (AAN): Tin biaha e situacion emocional di un persona, por pone haci cosnan eroneo sin cu el a pensa di antemano pa haci tal. Aki ta referi na Tim Miller, fundador di Texas EquuSearch, kende recientemente tabatin un intercambio di palabra no mucho bunita cu famia Van der Sloot na Montaña.

E equipo di Texas EquuSearch a yega den fin di siman cu a pasa cu nan Ground-Penetrating Radar hunto cu un par di newscrew Mericano, pafor di cas di Paulus van der Sloot, y cu voz halto tabata grita pa e habitante bin pafor.

Esnan di Texas EquuSearch a bay cu e pensamento, cu si acaso Paulus no tin nada di sconde, anto automaticamente e lo laga nan busca riba y rond di su propiedad. Aparentemente riba conseho di su abogado,



famia Van der Sloot no a bay di acuerdo.

Aki ta loke cierto palabranan pisa, incluyendo algun hopi menazante, a cay. Indicacion ta muestra cu nan a bin for di skina di Tim Miller mes di Texas EquuSearch.

A base di esaki, Polis a hayu

e denuncia aki, y a pidi pa e fundador di Texas EquuSearch presenta na Warda di Polis pa un "combersacion".

Aparentemente a muestra Miller riba e hecho cu palabranan di menaza ta un acto castigable na Aruba.

BETH TA BANDONA ARUBA TE SEPTEMBER

Diaranzon mes, Beth Holloway Twitty a regresa Aruba, determina pa sigui empuha pa e investigacion keda riba mesun linea. Aparentemente el a bay Alabama, y a regresa cu e.o. algun videotape mas cu el a haya di Natalee, y esakinan a worde pasa na TV Mericano riba Diaranzon anochi mes.

Awor Beth a duna un fecha nobo cu e lo bandona Aruba, y esey ta 4 di September. Esey ta e mesun dia cu e sospechoso Joran van der Sloot, lo por worde libera si acaso autoridad no logra

acuse formalmente di crimen.

DATELINE-NBC DI AWE LO TA HOPI INTERESANTE

Henter siman caba, tin indicacion cu e edicion di "Dateline NBC" di awe Diabierna anochi, lo duna un enfoque auto-critico riba prensa Mericano pa cu e cobertura cu nan ta duna den casonan di profil halto, di hendenan cu ta desaparece.

Ta parce cu canalnan di TV Mericano ta enfoca riba un caso di desaparicion, solamente si e persona ta muher, color blanco, y bunita.

Pesey mes, Dateline NBC ta e unico cu a tripi di haci un raportahe riba esey. E periodista Josh Mankiewicz a pidi varios hefe di e.o. ABC News, CBS News, CNN, y

Fox News Channel nan comentario, pero ta esun di NBC News ta e unico cu a elabora.

Nan ta muestra cu e caso di Natalee Holloway na Aruba, a haya un cobertura sin fin y ta fada hende caba, e.o. cu Greta van Susteren di Fox News Channel, y Nancy Grace di CNN Headline News.

E reclamo di mas grandi, ta cu tin hopi otro caso di muhernan di color, of hasta homber, kendenan ta perdi na Merca pero no ta haya ni 10 seconde di cobertura. Esaki ta loke Dateline NBC lo bay enfoca riba dje.

E programa di Dateline NBC lo pasa awe Diabierna pa 8'or di anochi. E speranza tey cu ATV lo tin e programa aki riba tape-delay, pa e por pasa mas laat.